

[Namminersorlutik Oqartussat suliffeqarfiutaasa ingerlatseqatigiiffittut ingerlasut namminersortunngorsarneqarsinnaanerat pillugu qulaajaasoqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut](#)  
(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

### **Akissuteqaat**

(Naalakkersuisut siulittaasuat)

### **Siullermeerneqarnera**

Naalakkersuisut isumaqatigaat killilersugaanngitsumik tuniniaaviit arlaatigulluunniit inuiaqatigiinni ineriartortinneqarsinnaanerata, taamaammallu siunniuttariaqaripput namminersortunik pisortat piginnittuunerata oqimaaqatigiissuunissaa siunertamullu naleqquttuunissaa. Isuma taamaattoq Namminersorneq pillugu Ataatsimiititaliarsuup isumaliutissiissutaani 2003-meersumi, ingerlatseqatigiiffiit pisortanit pigineqartut pillugit partiit tamarmik akuersaagaanni, taparserneqarpoq.

Namminersorneq pillugu Ataatsimiititaliarsuup kaammattuutigaa ingerlatseqatigiiffiit pisortanit pigineqartut ukiuni tulluittuni pingaartumik piginnaasaqarfimmik pingarnerit ingerlannissaannut annikillisinneqassasut siunnerfilerneqarlutillu. Ullumikkut ingerlatseqatigiiffiit qanoq ingerlanersut paasiuminaappallaarput nunallu aningaasaqarneranut naleqqiullugu angivallaarnertik pissutigalugu nunap ataatsimut aningaasaqarneranut annertoorujussuarmik attuisinnaallutik.

Siulersuisuniititaqarnermut Allattoqarfik Naalakkersuisut sinnerlugit ingerlatseqatigiiffinnik tamakkiisumik ilaannakuusumilluunniit Namminersorlutik Oqartussanit pigineqartunik piginnittuunermik suliaqartoq paasinaalluni sulivoq Naalakkersuisut qanoq iliuuseqarsinnaanerannik paasisaqarniarluni. Nassuiaammi ingerlatseqatigiiffiit tamaasa naliliisarluni misissorneqarput ingerlatseqatigiiffiillu ataasiakkaat siunissami suliaasaannut kaammattuuteqartoqassalluni.

Taamatut nalilersuinermi ingerlatseqatigiiffiit agguarneqarnissaat ilaasussaavoq, taamaalilluni ingerlatseqatigiiffiit inuiaqatigiinnut pisussaaffigalugu suliaqartut ingerlatseqatigiiffiillu niuernermi atugassarititaasunik atugaqarlutik ingerlasut namminersortullu allat paarlaanneqartannginniassammata. Tamanna ima paasineqassaaq ingerlatseqatigiiffiit ilaat nammineerlutik ingerlalernissaminnut naleqquttuussasut allallu niuernermi pissutsinik pissuteqartumik nammineerlutik ingerlalernissaminnut naleqquttuussanatik.

Ingerlatseqatigiiffinnik tamanik piginnittuunerup ilusiligaanerani imatut nalilersueqqittoqassaaq Namminersorlutik Oqartussat suliap aallartinneqannginnerani sapinngisamik pitsaanerpaamik aalajangiinissamut tunngavissaqalersillugit. Taamaammatt Naalakkersuisut paasiniaalluni sulineq utaqqimaarniarallarpaat aktiaateqarluni ingerlatseqatigiiffinni tamakkiisumik ilaannakuusumilluunniit Namminersorlutik Oqartussanit pigineqartuni nammineerluni ingerlalnissamut periarfissaasinnaasut pillugit inerniliisoqalersinnagu.

Taamaammatt Naalakkersuisut aalajangiiffigisassatut siunnersuut pisariaqanngitsutut isigaat paasiniaallunimi sulineq aallartinneqareermat.